

XVII  
d  
TRICESIMUS  
NATALIS

DIVI LEOPOLDI,  
IMP. CÆS. AUG.

PII, FELICIS, INVICTI,  
DEVOTA PIETATE  
CELEBRATUS,



NEW YORK  
JAN 1875

DIVISION  
THE CHANCE  
IN THE  
EVOTAT  
CELESTIAL

SACRA CÆSA-  
REA, REGIAQUE  
MAJESTAS.

**N**atales Imperantium celebrare sub bo-  
nis Principibus consuetudo, sub malis  
necessitas fuit, sub TE Pietas est, DO-  
MINE, qui ut salutare & beneficium  
fidus ante hos triginta annos vivere ac lucere cœ-  
pisti.

pisti. Aberat tunc domo AUGUSTISSIMUS PAREN-  
SENS, & ad Comitata Ratisbonensia profectus  
Germaniam vel bello tueri, vel pace compone-  
re meditabatur, sepositâ interim, ac exoptatissi-  
mæ Coniugi, tantum pignus utero ferenti, delega-  
tâ Familiæ curâ. Nec destituit hanc de Repub-  
licâ susceptam sollicitudinem cœlestis providen-  
tia, pro TE domi occupata, dum Divus Parens  
TUUS pro communi Patriâ foris districtus pri-  
vatas caritates bono publico postponit. Quo  
enim tempore sanctissimum pacandæ Germaniæ  
opus FERDINANDUS III, nulli ante se Princi-  
pum secundus, magno, sed tunc (quâ nondum  
propitia fati hora' advenerat:) irritò conatu ag-  
gressus est, non oblita pristini in Austriacum san-  
guinem favoris divina bonitas, coniunctissimam  
ejus consortem felicissimo partu levavit, ac in  
unius capitis ortu tot gentium salutis, tot provin-  
ciarum quieti prospexit. Et sanè optimo Prin-  
cipi absentia sua necessitate Reipublicæ imposita  
fraudi esse non debebat, ne omnium commodis  
intentus de propriis periclitaretur. Ita natus es,  
LEOPOLDE CÆSAR, in spem fiduciam-  
que secururæ post tot decumanos bellorum æ-  
tus, sævasque tempestates beatæ tranquillitatis,  
quam

quam ob peccata humani generis diu dilatam  
 placata Sacrificiis suspiriisque Numina serò tan-  
 dem anhelantibus terris reddiderunt, ut TU eo  
 fortunæ munere fruëreris, quod à Gloriosissimo  
 Avo magnis sudoribus multis laboribus per arma,  
 per fœdera, frustra quæsitum, à Maximo autem  
 Parente post exantlatas ingentes ac penè insupe-  
 rabiles difficultatum molestias ultimis Imperii an-  
 nis vix degustatum est. TIBI uni, AUGUSTE,  
 hoc beneficium cœlitus obtigit, ut inter strepen-  
 tes lituos, & horrentia Martis classica editus, ipso  
 Natali TUO Augurium Pacis inferres orbi; qui  
 deinceps, postquam tot cladium, tot calamita-  
 tum bellantes utrinque partes pudit, dicam an  
 pœnituit, nihil aliud quam execrari bellum, spi-  
 rare ac sperare pacem cœpit; eo paulatim succes-  
 su, qui agitatam tam diu, & propè subversam,  
 Christianæ Reip. navim è civilium dissidiorum  
 fluctibus, quos internis malis excitatos externa  
 irruentium undique ventorum vis immane quan-  
 tum inflaverat, in tutissimum desideratæ tran-  
 quillitatis portum subduxit. Itaque TU Auro-  
 ra Pacis, TU Phosphorus non prius in lucem,  
 quàm in spem redituri nobiscum in gratiam cœli  
 per discussas tonantis adhuc auræ nubes, prodiisti,

ne quis dubitaret, hoc esse sacrum illud delapsumque divinitus Ancile, quod nondum penitus averla fata fatiscentibus jam & deploratis ferè Germaniæ rebus desuper submitterent. Hinc prona ex eo & læta omnia, ac post Tragica vitæ TUÆ initia, domesticis etiam tum Sanctissimæ Matris, tum charissimorum Fratrum acerbis paulò ante, quam nascereris, mortibus, tum continuis ad Lipiam, ad Janckoviam, ad Zusmerhusam cladibus, & positis ad ipsius Viennæ moenia hostilibus castris funestata, triumphalis tandem ac gloriosus, restauratâ demum pace, exitus; jam tum TIBI nondum nato per Tuorum tumulos, per ardua & aspera ad augusta & summa viam sternentibus fatis, ac inter pueritiæ TUÆ lusus, innocentemque ignorantiam circa incrementa fortunæ TUÆ serio sollicitis, ut Imperium, de quo Majores TUI armis certabant, quiescenti offerrent: Quanquam absit, ut TE quicquam vitii ex eâ ætate traxisse asseram, quæ, ut prima, sic plerunq̃ue & suæ, & alienæ rei incuriosa duntaxat

*Gaudet equis, canibusq̃, & aprici gramine campi.  
Vel rudibus annis vividum animum in alia detorquet,*

torquet, ac cœlare, pingere, cantus, aut regimen  
equorum exercere, quam artes Imperio dignas,  
aut armorum rudimenta tractare mavult. TU,  
DOMINE, non prius esse, quam quantus olim  
evasurus fores, primò AUGUSTIS Parentibus,  
indolem in TE suam, suos mores jam à teneris  
unguiculis exosculantibus, dein Aulæ, sibi de tam  
egregio Juventutis Principe multum gratulanti,  
ac toti demum Germaniæ, imò universo paula-  
tim orbi ostendere cœpisti. Nimirum bonæ ar-  
boris statim planta cum fructu est, & Generosa  
in ortus semina exurgunt suos;

— *Nec imbellem feroces  
Progenerant AQUILÆ columbam.*

Inter armorum exercitia, quæ futurum Princi-  
pem semper decent, sæpè juvant & muniunt, in-  
ter meditamenta scientiarum, quibus destinata  
summis rebus ingenia ad magnæ fortunæ cultum  
excitantur, sub auspicio, & ad exemplum pater-  
næ virtutis, in quâ ne livor quidem carpendi ma-  
teriam invenit, à probatissimis moderatoribus  
enutritum educatumquè, quod miramur talem  
denique factum, qualem optavêre sui, stupuêre  
exteri, & prius omnium judicio meruisse Princi-  
patum,

patum, quàm obtinuisse eligentium suffragio?  
Quid mirum in hæc novissima, & infesta virtutibus tempora LEOPOLDUM nobis esse servatum, in quo certissimum consummatissimi, & supra omnem laudis mensuram absoluti Principis specimen observarent subditi, suspicerent hostes, intuerentur superstites, venerarentur postfuturi, quibus solis procul irâ & studio, quorum causas procul habent, sentire quæ volunt, & quæ sentiunt dicere, ac suum cuique decus rependere concessum est. Quis neget hunc superis placuisse, cujus jussu pax & bellum, terræ & maria regerentur, quemque vice suâ rebus mortalium præficerent? Nec aliunde factum, quod Adolescentia TUA tot lætis, tot tristibus temperata omen providis talium adnotatoribus ac indicium præbuit, nihil vulgare ab eo Principe expectandum, quem tot prospera, tot improspéra extulissent, quique ad usum secundorum non nisi per adversa venisset. Vidisti equidem, DOMINE, invictum non animi minus, quàm armorum robore Parentem, partâ per Germaniam Pace longè feliciorem, quàm si bellum per acies confecisset, Fratrem trium diadematum honoribus præeminentem salutasti, nullâ ei re, nisi solo nascendi ordine,

ne,



ne, cessurus: Festivus pacati orbis plausus, lætas  
& faustas subditarum Gentium voces Paternæ Fra-  
ternæque gloriæ unanimi ore applaudentes audii-  
sti; Verumenimverò, quemadmodum instabiles  
rerum vices sunt, ita fato quoque, ut integrita-  
tem TUAM in prosperis; (quorum perpetuo flu-  
xu egregiæ etiam mentes acrioribus secundioris  
fortunæ stimulis, adversus quos minus plerunque  
cauta mortalitas est, exploratæ insolescunt.) sic  
constantiam in adversis, quæ magnos & faciunt,  
& probant, experiri visum est. Hinc TIBI  
nondum prætextato erepta novissimæ prolis pu-  
erperio pientissima Mater, & in locum ejus suc-  
cessura eodem paulò post lethi genere extincta  
mitissima, & tanto privigno dignissima nover-  
ca; Vivis exemptus Frater, & vix peractâ inaugu-  
rali pompâ, nec post eam toto mense TECUM &  
in suorum complexu exacto à Palatio ad capu-  
lum transire jussus, tanquam ad hoc tantum TI-  
BI Fratri prælatus, ut prior moreretur, & ut  
quamvis famâ, spe, veneratione non destinatus  
modò, sed jam admotus Imperio ostensum sibi  
non promissum solium TIBI, quem fortuna in  
occulto tenebat, arcanâ lege fati reservatum sci-

B

ret.

ret. Excidit, quod malorum omnium comple-  
mentum fuit, TIBI, nondum septemdecim  
annos ingresso, sacratissimus Parens, eâ ætate,  
quâ TIBI optanda inprimis ejus longævitas  
fuerat, eâ tempestate, quæ tanti Rectoris præ-  
sentiam, prudentiamque vel maximè require-  
bat. Tot secunda adversis, tot improspere  
prosperis permixta, quem nobis alium pollice-  
ri, quem præstare potuerunt, quam utriusque  
fortunæ scientissimum Principem, & adver-  
sus alternantes ejus blanditias irasque non au-  
ditione duntaxat aut lectione, sed proprio usu,  
& tot insignibus experimentis firmatum? Ta-  
lem tantumque Heroem cum benigna Super-  
rûm gratia nobis tribuerit, Parentes, vel hâc  
solâ generatione beati, genuerint, tot dignis  
summo fastigio dotibus natura ornârit, virtus  
excoluerit, fortuna instruxerit, quid habemus  
cœli Dominum precari, quam ut hâc felicitate  
ad ultimum nobis spiritum frui liceat, & ut per  
singulos annos diu frequenterq; pro salute LEO-  
POLDI CÆSARIS vota nuncupemus, ne-  
que unquam aliud Imperantis nomen Germaniæ  
innotescat. Tricesimus hic natalis TUUS est,  
DO-

DOMINE, faxit æternitatis ille Pater, ut seculares TIBI ludos, (si per ætatis humanæ angustias eò aspirare fas est,) aliquando posteri faciant, vel saltem ut RUDOLPHI I. ac FRIDERICI IV. è gente TUA Cæsaram, vitæ ac potentiæ annos, utroque clarior & felicior superes, ac ut

*Illicos aquare senes aut vincere possis.*

Hoc quotidianum obstrictæ TIBI publicæ privatæque pietatis votum, hoc TUORUM omnium desiderium esse, satis testatæ sunt effusæ in nupero, unde vix recreatus es, morbo, universorum TIBI fidelium lacrymæ; hoc locuta est orta è recuperata cœlesti ope valetudine TUA, perque totam Germaniam, Italiam, Hispaniam, Sarmatiamque diffusa lætitia; neque tantam adversus nos, quamvis ultima exempla meritos, inclementiam fati fore credimus, ut uno ferali ictu, (quem Superi avertant!) subtrahat nobis unicum illud fulcrum, cui propagatio fundatæ longo Imperio Domus Augustæ, cui custodia Pacis, gloria belli, tutela Germaniæ, tranquillitas Europæ, totius

denique orbis securitas innititur. TU modò,  
DOMINE,

— — *Fatis accede Deisque,*

Et ut salvi per TE simus, salutem TUÆ prospice;  
Quod si, ut cœpisti, feceris, si vitæ TUÆ, si  
dignitati consuleris, nullum Numen aberit. Non  
deserent TE cœlestes excubiæ, nisi TIBI defue-  
ris, nisi præsidia, quæ præ manibus habes, dimi-  
seris, nisi noxia Imperio TUO, pacique nostræ,  
& TUORUM fidei animalia è medio tollere, & pe-  
stiferas herbas, atramque loliginem stirpitus evel-  
lere, pravosque ac vitiosos humores hæc illac in  
vasto provinciarum TUARUM corpore, inti-  
misque ejus visceribus hærentes fortioribus reme-  
diis expellere, ac foras ejicere distuleris. Vide,  
ne feceris, DOMINE, ne vitam eorum, qui  
propriam, dummodò TIBI officiant, contem-  
nunt, TUA potiore habearis; Quod præpostera  
misericordiæ genus vim crudelitatis induit, quæ  
dum paucis sceleratis parcit, bonos omnes in exi-  
lium agit. Frustra est, qui efferatas semel bestias  
(in quarum hodiè homines ingenia transeunt,)   
beneficiis cicurari, mansuetudine placari, leni-  
mentis

mentis & mollibus consultis sanari posse credit.  
Semel quidem illis ignosci culpa, remitti poena  
potest, at illi semper meminisse offensæ, eò acri-  
oris, quia iniquæ, uti proprium est humani in-  
genii odisse, quem læleris. Minoribus delictis  
venia gratiam, magnis odium, & patrandi po-  
tius quam tentandi animum conciliat, cum mul-  
ti haud ignari in talibus periculosius esse depre-  
hendi, quam audere, sævitiam in atrocibus ejus-  
modi facinoribus, quam poenitentiam malint.  
Infantibus infantia consilia, flagitiis manifestis  
subsidium ab audacia petitur, cui, quando ultima  
timentur, spretâ præsentium invidia, nihil me-  
dium inter summa & præcipitia, inter cædem &  
necem, inter sicam & securim est, præcipuè e-  
vulgato semel extremæ improbitatis arcano, re-  
gicidia incipi cum periculo, peragi cum præ-  
mio. Cave, CÆSAR, & his monstris ac no-  
vercantis ævi portentis Palatium, Curiam, Pro-  
vincias, Castra libera. Ita vitam TUAM au-  
gebis, ita Famam, ut nec inimici quidem TUI  
in necem hætenus TUAM, nostramque perni-  
ciem intenti queri quicquam imposterum aude-  
ant, nisi de magnitudine TUA, cui nemo invi-  
det,

det, nisi qui eâ se minorem clam dolet, palàm  
fatetur. Eam **TECUM**, **TE** in ea servet,  
proteget, tueatur Ille, per quem Reges regnant,  
ac

*De nostris, LEOPOLDE, TUOS DEUS au-  
geat annos,*

In quo salutis humanæ augurio desinit, & ad Au-  
gusti solii **TUI** gradus humillimè se prosternit

**NUMINIS MAJESTATISQUE T.**

*Devotissimus & subjectissimus  
servus ac subditus*

**N. N.**